



說郛目錄

身第六十二

雲南志畧

李京

遼東志畧

戚輔之

桂海虞衡志

范成大

岳陽風土記

范致明

真臘風土記

周達觀

陳畱風俗傳

江徽

成都古今記

趙朴

臨海水土記

臨海異物志 沈瑩

雲南志略

元 李京

雲南上世無可稽考按華陽國志楚威王遣莊躋略地巴黔伐夜郎抵牂牁西至滇池會秦奪楚黔中地不得歸遂留王滇池雲南通中國自此始漢武帝開爨道通西南夷元狩元年使呂越人等徃身毒國至滇滇王留使者四歲使者還言滇大國元鼎五年發巴蜀罪人及八校尉兵伐之南人震恐請置吏遂立越雋郡後諷滇王入朝不聽元封二年發巴蜀兵征

之滇王降以滇爲益州地節二年復叛以金城司馬
陳立爲牂牁太守平之明帝永平元年諸部悉反以
安漢侯張翕討之度蘭滄江置永昌郡以廣漢鄭純
爲永昌太守元初四年越雋反諸部皆應之詔益州
刺史張喬討之叛酋封離等詣喬陳叛亂之由乞降
喬厚加慰納奏長吏姦猾侵犯蠻夷者凡十餘人皆
斬之三十六部聞之悉來內附蜀建興三年諸葛亮
南征聞孟獲爲夷漢所服募生致之凡七縱七擒獲
曰公天威也南人不復反矣諸部悉平亮卽其渠帥

而用之或以諫亮亮曰若留外人而無兵必成禍患
今吾欲不留兵運糧紀綱粗定夷漢粗安于是悉收
豪傑以爲官屬出其金銀丹漆牛馬以給軍國之用
終亮之世夷不復反晉武帝以天水李毅爲南蠻校
尉統五十八部毅卒寧州夷叛救援莫至毅女秀明
達有父風衆推秀領寧州事嬰城固守城中糧盡掘
鼠而食伺夷稍怠輒出擊之終得保完今有廟在晉

寧州

武帝時以夔深爲興古太守今曲靖也夔人之名始

雲南志略
此齊永平中以陳顯達爲益州都督顯達一日夷人
慢之顯達遣使責其租稅獠帥曰兩目刺史尚不能
調況一目耶遂殺其使顯達分遣將帥聲言出獵夜
往襲之無少長盡殺之蠻夷震服梁武帝大同三年
武陵王紀都督益州先是蜀亂建寧越雋之地累朝
不能有至紀開越雋通建寧貢獻方物十倍前人以
夔瑣爲南寧州刺史隋開皇中以史萬歲南征蠻夷
皆降師還復叛蜀王秀奏萬歲貪賂致生邊患萬歲
以罪廢乃以梁毗爲西寧州刺史諸酋相率以金遺

毗毗置金坐側對之慟哭曰此物饑不可食寒不可
衣汝等以此相殘何爲今將此來欲殺我也耶一無
所取蠻酋大悅唐武德元年以夔弘達爲毗州刺史
開元中以鬼王夔歸玉爲寧州都督初蠻酋張氏名
仁果時當漢末居蒙舍州爲在諸部之南故曰南詔
詔漢語國君也傳三十三主至樂進永爲蒙氏所滅
蒙氏名細奴邏城蒙舍龍之子圖而都之國號大蒙
自稱竒王雲南建國稱王始此唐貞觀三年也在位
二十一年子羅晟立是爲興宗王始用三軍景雲元

雲南志略 三
年御史李知古請兵伐南詔南詔臣伏知古增置郡
縣而重賦之諸部皆叛殺知古以其尸祭天羅晟在
位二十七年晟子羅皮立是爲太宗王始得意于六
詔蒙氏居蒙舍川號蒙舍詔施望大據石和城號施
詔浪豐咩據遼睽川號遼睽詔豐時據浪穹號浪穹
詔波衝據越折川號未步詔輔原羅據越雋號蒙隹
詔是爲六詔開元二年遣其相張建成入朝玄宗厚
禮之賜浮屠像雲南始有佛書在位三十七年子皮
羅閣立賂劔南節度使王昱未合六詔朝廷從之封

大酋帥越國公雲南王賜名歸義盡有雲南之地自
是以後不可復制在位五十年禪其子閣羅鳳是爲
武王改元曰建鍾南雲改元始此閣羅鳳妻女嘗謁
都督張虔陀虔陀皆通之且多求乞閣羅鳳不勝其
忿遂發兵反攻陷姚州殺虔陀唐以劔南節度使鮮
于仲通將兵八萬討之蒙使行成弗許及戰仲通大
敗僅以身免閣羅鳳乃結知吐蕃刻石于龍尾閣明
其不得已叛唐之意天寶十三年劔南留後李密將
兵七萬致討閣羅鳳誘之全軍以沒唐益發兵竟不

克前後死者二十餘萬人在位二十年禪其子鳳伽
異自號主父居太和城鳳伽異立是爲悼惠王改元
長壽徙都鄯闡在位十一年子異牟尋立是爲孝恒
王改元建龍制清平官以下十司給服祿徙都苴咩
城封點蒼山爲中岳遣烏蠻鬼主孟衡苴來朝復臣
于唐與劔西南節度使韋臯連兵伐吐蕃大破之取
鉄橋等三十五城在位三十年子尋閣劼立是爲孝
惠王改元應道在位三年子劼龍晟立是爲幽王改
元龍興淫虐不道弄權節度蒙苴顛弑之在位五年

弟勸劼利立是爲靖王改元全義在位八年弟劼豐
佑立是爲成昭王改元保和又改天啓唐太和三年
蠻有學書子弟在成都者盡得蜀之虛實遣清平官
蒙苴顛大舉入寇取邛成戎雋三州遂入成都掠于
女百工數萬人南歸在位三十六年子世隆立始僭
帝號改元建極遣清平官董成入朝于唐受獻國禮
而還九年遣楊酋慶歸所俘三千人唐殺酋慶十年
世隆自將侵蜀遂破成都自是大渡河以南盡屬蒙
矣在位十八年殂于越雋謚景莊子法堯立改元眞

雲南志略 五
明嬖崑崙女失道豎人楊定趙登弒之在位二十年
子舜化立改元中興在位三年布燮鄭買辭篡之國
滅蒙氏自細奴羅至舜化共十三主合二百四十七
年卽唐光化二年也買嗣唐瀘今鄭回之後閻羅鳳
陷雋州得回以爲清平官遷侍中至買嗣漸盛竟至
于篡買嗣易名昶國號大和改元安國在位九年子
仁旻立凡五改元曰孝治天瑞安和真佑初曆在位
十八年侍中趙善政篡之善政立國號興元改元應
天歷二年劔川節度使楊干真殺之干真國號義寧

改元曰光聖曰皇興曰大明曰鼎新曰建國凡九年
通海節度使段思平滅之時晉天福二年也思平蒙
氏清平官忠國六世孫布燮保隆之子國號大理改
元文德都苴咩城在位八年號太祖先帝宋太祖建
隆三年王全斌克蜀欲因取雲南太祖止之曰德化
所及蠻夷自服何在用兵于是開邊之釁息矣子思
英立改元文經在位一年遜位爲僧思平母弟興胃
立改元王治在位五年殂謚文武先皇子思聰立改
元明德又改廣德聖德在位十七年子秉英立改元

日廣明又改曰明應明聖明治明統在位二十五年
子秉廉立改元明啓在位十三年秉英之孫秉隆立
改元明通在位五年遜位爲僧秉廉之子秉真立改
元政治在位一十六年秉英之孫秉興立改元聖明
在位三年思平五世孫思廉立改元曰保安太安政
安正德保德在位三十年子廉義立改元上德在位
七年遇弒思平五世孫暉受立改元上明在位一年
思廉之孫政明立改元曰保定建安天祐在位十六
年遜位于鄯闡岳牧高泰昇昇立改元上治國號大

中歷二年殂子孫不敢繼復歸段氏政明之子政淳
立改元天授明開天政文安在位十三年子政嚴立
改元日新文治永嘉天保廣運在位四十年子政興
立改元永真天保龍興聖明建德在位二十六年子
正智立改元利貞盛德嘉會元亨安定在位二十九
年子智廉立改元鳳歷元壽在位六年子智祥立改
元天開天輔仁壽在位三十四年子祥興立改元道
隆在位十六年子興智立改元天定是歲壬子越明
年欽遇我世祖皇帝由吐蕃麗江入興智舉國出奔

至鄯闡被擒段氏自思平至興智共二十二王合三百一十六年甲寅春大駕東還命大將兀良吉歹專行征伐三十七部及金齒交趾舉皆內附雲南悉平兀良吉歹回師之後委任非人政令屢變天庭高遠不相聞知邊鄙之民往往復叛迨至元甲戌以平章政事賽天赤行省雲南下車之日立前縣均賦役興水利置屯田擢廉能黜汙濫明賞罰恤孤貧秉政六年民情丕變政令一新而民不知擾及薨之日遠近聞之如喪父母于時公于內庭眷顧甚重凡屬職除授及南方便宜無不俞允而公亦開誠布公寬大廉簡故能上下感戴聲名洋溢後之繼者雖有善政莫能及也嗚呼雲南自古爲蜒獠之城秦漢以來雖略通道然不過發一將軍遣一使者以鎮遏其相殘慰喻其祈懇而已所任得人則乞憐效順任非其人則相率以叛羈縻苟且以暨于唐王師屢覆而南詔始盛天寶以後值中原多故力不暇及五季擾亂而鄭趙楊氏亦復攘據宋興分于遼夏未遑遠略故蒙段二姓與唐宋相終始天運動興文軌混一欽惟世祖

皇帝天戈一指盡六朝之地皆爲郡縣迄今吏治文
化侔于中州非聖化溥博何以臻此而輿地風物未
至紀錄實爲缺典今撮其古今廢置人物山川等類
爲一編甚懼未能固知悉覽然其大略亦足以提絜
一方之要領云

遼東志略

元 戚輔之

遼東地方數千里東踰鴨綠而控朝鮮西接山海而
抵大寧南跨溟渤而連青冀北越遼東而拒沙漠又
東北至奴兒干涉海有吉列迷諸夷之地咸屬統內
稽古州郡有沿有革或分或合名號不一難以蓋載
若不備之于註則始末奚詳今以歷代統屬提其要
而因革事實繫而紀之

遼東

明
國
書
院
藏
書

遼東在九州之東故曰遼東一曰遼陽水南曰陽遼
宋西之地其南皆遼海故曰遼陽一曰襄平遼東所
理也漢之城名不知何所取義郡名襄平者以城而
得名也漢初有襄平侯統通矯制納周勃于北軍討
平諸呂

遼西

遼西在遼水西故曰遼西上黨漁陽大寧廣寧迤東
皆古遼西地

樂浪

漢武元狩中開其城置郡本朝鮮地箕子所封高麗
所都之平壤城即漢之王陵城樂浪之所理也

玄菟

古朝鮮地漢武置郡去幽州東地三千里明帝築玄
菟城

真番

東夷國名應劭曰玄菟郡本真番國漢武置郡

臨屯

漢武元狩中置郡

遼東志
帶方

古帶方國漢末曹操置郡在遼東之東屬平州括地志云帶方故城在樂浪界

肅慎氏

以下夷國

史記虞舜本紀北山戎發息慎鄭玄曰息慎五百里北與沃沮相接自周武王至魏高貴鄉公東晉元帝及石季龍時皆貢楛矢石柰其國東北山出石其利如鐵取以爲鏃卽石柰

靺鞨

括地志云肅慎氏卽今靺鞨有黑水靺鞨渤海靺鞨沈括曰黑山在太幕之北有城在其西南名慶州守奉使嘗帳宿其下土石皆紫黑水出其西所謂黑水也靺鞨居黑水之北因名黑水靺鞨居扶餘城爲阿保機所滅改東丹國

勿吉

本肅慎氏之國後魏以後改爲多勿吉

挹婁

東夷種名古肅慎氏國也在扶餘東北卽魏時挹婁

國

朝鮮

周初封箕子國于朝鮮餘見後高麗註

高麗

本朝鮮地漢武置縣屬樂浪郡後漢以後累代皆受
中國封爵都平壤城卽朝鮮國王險城也本扶餘別
種平壤城亦名長安有水出靺鞨之白山色若鳴綠
土人喜學至窮理亦矜勉

新羅

居漢樂浪地在北濟東南魏晉以後分王三韓之地

百濟

馬韓之屬也本扶餘王東明之後有仇台者篤于仁
信立國于帶方故地遂爲東夷強國仇以百家濟海
因號烏東極新羅高嚴西南俱限海其都曰居枝城
亦曰故麻城

高勿驪

東夷國名居遼東之東其先出扶餘王嘗得河泊女
閉于室內爲日所照旣而有娠生卵置空處有一男

破卵而出及長字之曰朱蒙其俗言朱蒙者善射也
雖一夫獸甚多扶餘人欲殺之朱蒙走紇骨城居之
號曰高勿驪因以高為氏

扶餘

地名在長安城北本藁離國王子名東明者王欲殺
之走渡施掩水因都扶餘故以為號在高麗北挹婁
南有軍事則祭天殺牛觀蹄以占吉凶碎者為凶合
者為吉其王葬用玉匣

東胡

趙東有瀛州之地東北營州之境即東胡烏桓地服
虔曰東胡乃烏桓之先其後為鮮卑國在匈奴東故

號東胡

烏桓

烏桓與鮮卑皆東胡種漢初匈奴冒頓東破扶餘眾
散保烏桓鮮卑二山因以為族

鮮卑

國在遼東後有居遼水西者餘見烏桓注

渤海

通東志略
本粟靺鞨附高麗者姓大氏南北皆新羅東窮海西
初爲渤海郡南宋應初爲渤海國北有五京十五府
六十二州東京曰龍原府南京曰鳴綠府去長城八
十里

沃沮

東夷國在高麗南太山之東

辰國

古有三韓國曰馬韓曰辰韓曰弁韓此其一也在朝
鮮真番之東濊貊之南

濊貊

東夷國名三韓之屬與高麗同種在辰韓之北高麗
沃沮之南朝鮮之東東窮大海皆以濊爲氏

北貉

北方豸種昂濊也與高麗同種在辰韓北朝鮮東東
窮大海

契丹

東胡種居西樓在潢水南黃龍北得鮮卑故地或以
爲鮮卑遺種元魏時自號契丹五代末稱大陽契丹

其地有二水一曰北也箇没里華言玉河源出中京西南孟山東北流一曰島羅箇没里華言潢河源出饒州西南平地松林直東流至木葉山與玉河合流爲一相傳初有男子乘白馬浮玉河下一婦人乘小車子浮潢河而下過木葉山顧合流之水遂爲夫婦此其始祖

女真

本完顏氏始居按出虎水于是國號大金至河骨打始大按出虎華言金也有金線河在今上京會寧府

女真種類不一開原以南爲熟女真宋以前曰女真元祖名貼木真因改爲直

孤竹國

在平州濱東海地志孤竹國城在遼西今文縣

白習奚霫

奚本號庫莫奚其先東胡宇文之別種爲匈奴所破竄居漠之東與突厥同俗魏書達奚薄奚統奚吐奚四民皆其部俗也至隋始去庫莫而但曰奚唐末居陰涼川在幽州西南郡白霄樂也鐵勒諸部之號其

通東志略 卷之七
後契丹強奚乃舉部後屬于霄有東西奚

桂海虞衡志序

始余自紫薇垣出帥廣右姻親故人張飲松江皆以
炎荒風土爲戚余取唐人詩考桂林之地少陵謂之
宜人樂天謂之無瘴退之至以湘南江山勝於驂鸞
仙去則宦遊之適寧有踰於此者乎旣以解親友而
遂行乾道八年三月旣至郡則風氣清淑果如所聞
而巖岫之奇絕習俗之醇古府治之雄勝又有過所
聞者余旣不鄙夷其民而民亦矜予之拙而信其誠
相戒毋欺侮歲比稔幕府少文書居二年余心安焉

承詔徙鎮全蜀亟上疏固謝不能留再閱月辭勿獲命乃與桂民別民觴客於途既出郭又留二日始得去航瀟湘絕洞庭沂灩澦馳驅兩川半年達于成都道中無事時念昔游因追記其登臨之處與風物土宜凡方志所未載者萃爲一書蠻陬絕徼見聞可紀者亦附著之以備土訓之圖噫錦城以名都樂國聞天下余幸得至焉然且惓惓於桂林至爲之綴緝瑣碎如此蓋以信余之不鄙夷其民雖去之遠且在名都樂國而猶弗忘之也淳熙二年長至日吳郡范成

大志能書

桂海虞衡志目錄

志巖洞

志金石

志香

志酒

志器

志禽

志獸

志虫魚

志花

志果

志草木

雜志

志蠻

目錄終

桂海巖洞志

宋 范成大



余嘗評桂山之奇宜為天下第一士大夫落南者少徃徃不知而聞者亦不能信余生東吳而北撫幽薊南宅交廣西使岷峽之下三方皆走萬里所至無不登覽太行常山衡嶽廬阜皆崇高雄厚雖有諸峯之名政爾魁然大山峯云者蓋強名之其最號奇秀莫如池之九華歛之黃山括之仙都溫之鴈蕩夔之巫峽此天下同稱之者然皆數峯而

止爾又在荒絕僻遠之瀕非几杖間可得且所以能拔乎其萃者必因重岡複嶺之勢盤亘而起其發也有自來桂之千峯皆旁無延緣悉自平地巖然特立玉筍瑤簦森列無際其怪且多如此誠當爲天下第一韓退之詩云水作青羅帶山如碧玉簪柳子厚訾家洲記云桂州多靈山發地峭豎林立四野黃魯直詩云桂嶺環城如鴈蕩平地蒼玉忽差峩觀三子語意則桂山之奇固在目中不待余言之贅頃嘗圖其真形寄吳中故人蓋無深信者二三里一日可以徧至今推其尤者記其畧

讀書巖在獨秀峯下直立郡治後爲桂主山傍無坡阜突起千丈峯趾石屋有便房石榻石牖如環堵之室顏延年守郡時讀書其中

伏波巖突然而起且千丈下有洞可容二十榻穿鑿通透戶牖傍出有懸石如柱去地一線不合俗名馬伏波試劍石前浸江濱波浪洶湧日夜漱齧之

疊綵巖在八桂堂後支徑登山太半有洞曲轉穿山背

白龍洞在南溪平地半山中龕有大石屋由屋右壁入洞行半途有小石室

劉仙巖在白龍洞之陽仙人劉仲遠所居也石室高寒出半山間

華景洞高廣如十間屋洞門亦然

水月洞在宜山之麓其半枕江天然剜刻作大洞門透徹山背頂高數十丈其形正員堊之端整如大月

輪江別派流貫洞中踞石弄水如坐捲蓬大橋下

龍隱洞龍隱巖皆在七星山脚沒江水中泛舟至石

壁下有洞門高可百丈鼓櫂而入仰觀洞頂有龍跡天矯若印泥然其長竟洞舟行僅一箭許別有洞

門可出巖在洞側山半有小寺卽巖爲佛堂不復屋雉巖亦江濱獨山有小洞洞門下臨灘江

立魚峯在西山後雄偉高峻如植立一魚餘峯甚多皆蒼石刻峭

棲霞洞在七星山七星山者七峯位置如北斗又一

小峯在傍曰輔星石洞在山半腹入石門下行百餘級得平地可坐數十人傍有兩路其一西行兩壁石液凝沍玉雪晶熒頂高數十丈路闊亦三四丈如行通衢中頓足曳杖鏗然有聲如鼓鐘聲蓋洞之下又有洞焉半里遇大壑不可進一路北行俯樓而入數步則寬廣兩傍十許丈鍾乳垂下纍纍凡乳牀必因石脉而出不自頑石出也進里餘所見益奇又行食頃則多岐遊者恐迷途不敢進云通九疑山也

元風洞去棲霞傍數百步風自洞中出寒如冰雪

元字

胡滯切

曾公洞舊名冷水巖山根石門砢然入門石橋甚華曾丞相子宣所作有澗水莫知所從來自洞中右旋東流橋下復自右入莫知所往或謂泱流入于江也度橋有仙田數畝過田路窄且濕俯視石罅尺餘匍匐而進旋復高曠可通棲霞

屏風巖在平地斷山峭壁之下入洞門上下左右皆高廣百餘丈中有平地可宴百客仰視鍾乳森然倒垂者甚多躡石磴五十級有石穴通明透穴而出則

山川城郭恍然無際余因其處作朝天觀而命其洞曰空明

隱山六洞皆在西湖中隱山之上一日朝陽二日夕陽三日南華四日北牖五日嘉蓮六日白萑泛湖泊舟自西北登山先至南華出洞而西至夕陽洞窮有石門可出至北牖出洞十許步至朝陽又西至北牖穴口隘狹側身入有穴通嘉蓮西湖之外既有四山巉巖碧玉千峯倒影水面固已奇絕而湖心又浸陰山諸洞之外別有奇峯繪畫所不及荷花時有泛舟

故事勝賞甲於東南

北潛洞在隱山之北中有石室石臺石果之屬石果作荔枝胡桃棗栗之形人采取玩之或以釘盤相問遺

南潛洞在西湖中羅家山上

佛子巖亦名鍾隱巖去城十里號最遠一山萃起莽蒼中山腰有上中下三洞最廣中洞明敞高百許丈上洞差窄一小寺就洞中結架因石屋爲堂室虛秀洞去城差遠大石室面平野室左右皆有徑隧

各數十百步穿透兩傍亦臨平野以上所紀皆附郭
 可日涉者餘外邑巖洞尚多不可皆到興安石乳洞
 最勝余罷郡時過之上中下亦三洞此洞與棲霞相
 甲乙他洞不及也陽朔亦有綉山羅漢白鶴華蓋明
 珠五洞皆奇又聞容州都嶠有三洞天融州有靈巖
 真仙洞世傳不下桂林但皆在瘴地士大夫尤罕到

桂海金石志

宋 范成大

本草有玉石部專主藥物非療病雖重不錄此篇
 亦主為方藥所須者

生金出西南州峒生山谷田野沙土中不由礦出也
 峒民以淘沙為生坏土出之自然融結成顆大者如
 麥粒小者如麩片便可鍛作服用但色差淡耳欲令
 精好則重鍊取足色耗去什二三既鍊則是熟金丹
 竈所須生金故錄其所出



丹砂本草以辰砂爲上宜砂次之今宜山人云出砂處與湖北犬牙山北爲辰砂南爲宜砂地脉不殊無甚分別宜砂老者白色有墻壁如鏡生白石牀上可入煉勢敵辰砂本草圖經乃云宜砂出土石間非白石牀所生卽是未識宜砂也別有一種色紅質嫩者名土坑砂乃是出土石間者不甚耐火邕州亦有砂大者數十百兩作塊黑闇少墻壁嚼之紫黛不堪入藥彼人惟以燒取水銀圖經又云融州亦有砂今融州元無砂邕融聲相近蓋誤云

水銀以邕州溪洞朱砂末之入鑪燒取極易成以百兩爲一銚銚之制以猪胞爲骨外糊厚紙數重貯之不漏

鍾乳桂林接宜融山中洞穴至多勝連州遠甚余遊洞親訪之仰視石脉湧起處卽有乳牀如玉雪石液融結所爲也乳牀下垂如倒數峯小山峯端漸銳且長如冰柱柱端輕薄中空如鶯管乳水滴瀝未已且滴且凝此乳之最精者以竹管仰盛折取之鍊治家又以鶯管之端尤輕明如雲母爪甲者爲勝

銅邕州右江州峒所出掘地數尺卽有礦故蠻人好用銅器

綠銅之苗也亦出右江有銅處生石中質如石者名石綠又有一種脆爛如碎土者名泥綠品最下價亦賤

滑石桂林屬邑及猺洞中皆出有白黑二種功用相似初出如爛泥見風則堅又謂之冷石土人以石灰巧壁及未乾時以滑石末拂拭之光瑩如玉

鉛粉桂州所作最有名謂之桂粉其粉以黑鉛著糟甕化之

無名異小黑石子也桂林山中極多一包數百枚石梅生海中一叢數枝橫斜瘦硬形色真枯梅也雖巧工造作所不能及根所附著如覆菌或云本質爲

海水所化如石蟹石蝦之類石柏生海中一幹極細上有一葉宛是側柏扶疎無小異根所附著如烏藥大抵皆化爲石矣此與石梅

雖未詳可以入藥否然皆奇物不可不志

桂海香志

宋 范成大

南方火行其氣炎上藥物所賦皆味辛而嗅香如
 沉箋之屬世專謂之香者又美之所鍾也世皆云
 二廣出香然廣東香乃自舶上來廣右香產海北
 者亦凡品惟海南最勝人士未嘗落南者未必盡
 知故著其說

沉水香上品出海南黎峒一名土沉香少大塊其次
 如繭栗角如附子如芝菌如茅竹葉者佳至輕薄如

紙者入水亦沉香之節因久蟄土中滋液下流結而爲香採時香面悉在下其背帶木性者乃出土上環島四郡界皆有之悉冠諸蕃所出又以出萬安者爲最勝說者謂萬安山在島正東鍾朝陽之氣香尤醞藉豐美大抵海南香氣皆清淑如蓮花梅英鶯梨蜜脾之類焚一博投許氣翳彌室翻之四面悉香至煤燼氣不焦此海南香之辨也北人多不甚識蓋海上亦自難得省民以牛博之於黎一牛博香一擔歸自差擇得沉水十不一二中州人士但用廣州舶上占城真臘等香近年又貴丁流眉來者余試之乃不及海南中下品舶香徃徃腥烈不甚腥者意味又短帶木性尾煙必焦其出海北者生交趾及交人得之海外蕃舶而聚于欽州謂之欽香質重實多大塊氣尤酷烈不復風味惟可入藥南人賤之

蓬萊香亦出海南卽沉水香結未成者多成片如小笠及大菌之狀有經一二尺者極堅實色狀皆似沉香惟入水則浮剝去其背帶木處亦多沉水

鷓鴣斑香亦得之于海南沉水蓬萊及絕好箋香中

榘牙輕鬆色褐黑而有白斑點點如鷓鴣臆上毛氣尤清婉似蓮花

箋香出海南香如蝟皮栗蓬及漁蓑狀蓋修治時雕鏤費工去木畱香刺棘森然香之精鍾於刺端芳氣與他處箋香夔別出海北者聚於欽州品極凡與廣東舶上生熟速結等香相埒海南箋香之下又有重漏生結等香皆下色

光香與箋香同品第出海北及交趾亦聚於欽州多大磈如山石枯槎氣麤烈如焚松檜曾不能與海南箋香比南人常以供日用及常程祭享沉香出交趾以諸香草合和蜜調如薰衣香其氣溫磨自有一種意味然微昏鈍

香珠出交趾以泥香捏成小巴豆狀琉璃珠間之絲貫之作道人數珠入省地賣南中婦人好帶之思勞香出日南如乳香歷青黃褐色氣如楓香交趾人用以合和諸香

排草出日南狀如白茅香芬烈如麝香亦用以合香諸草香無及之者

檳榔苔出西南海島生檳榔木上如松身之艾蒨單
焚極臭交趾人用以合泥香則能成溫磨之氣功用
如甲香

橄欖香橄欖木脂也狀如黑膠飴江東人取黃連木
及楓木脂以爲欖香蓋其類出于橄欖故獨有清烈
出塵之意品格在黃連楓香之上桂林東江有此果
居人采香賣之不能多得以純脂不雜木皮者爲佳
零陵香宜融等州多有之土人編以爲蓆薦坐褥性
煖宜人零陵今永州實無此香

桂海酒志

宋 范成大

余性不能酒士友之飲少者莫余若而能知酒者
亦莫余若也頃數士于朝游王公貴人家未始得
見名酒使虜至燕山得其宮中酒號金蘭者乃大
佳燕西有金蘭山汲其泉以釀及來桂林可飲瑞
露乃盡酒之妙聲震湖廣則雖金蘭之勝未必能
頡頏也

瑞露帥司公廚酒也經撫所前有井清烈汲以釀遂

有名今南庫中自出一泉近年只用庫井酒仍佳
古辣泉古辣本賓橫間墟名以墟中泉釀酒既熟不
煮埋之地中日足取出

老酒以麥麴釀酒密封藏之可數年士人家尤貴重
每歲臘中家家造鮓使可為卒歲計有貴客則設老
酒冬酢以示勤婚娶亦以老酒為厚禮

桂海器志

宋 范成大

南州風俗猱雜蠻獠故凡什器多詭異而外蠻兵
甲之製亦邊備之所宜知者

竹弓以熏竹為之勑膠之制一如角弓惟揭箭不甚
力

黎弓海南黎人所用長稍木弓也以藤為弦箭長三
尺無羽鏃長五寸如茨菰葉以無羽故射不遠三四
丈然中者必死

蠻弩諸峒獠及西南諸蕃其造作畧同以硬木爲弓
椿甚短似中國獵人射生弩但差大耳

獠人弩又名編架弩無箭槽編架而射也

藥箭化外諸蠻所用弩雖小弱而以毒藥濡箭鋒中
者立死藥以蛇毒草爲之

蠻甲惟大理國最工申胄皆用象皮胸背各一大片
如龜殼堅厚與鐵等又聯綴小皮片爲披膊護項之
屬製如中國鐵甲葉皆朱之兜鍪及甲身內外悉朱
地間黃黑漆作百花蟲獸之文如世所用犀毗器極
工妙又以小白貝纍纍駱甲縫及裝兜鍪疑猶傳古
貝胄朱綬遺製云

黎兜鍪海南黎人所用以藤織爲之

雲南刀卽大理所作鐵青黑沉沉不銹南人最貴之
以象皮爲鞘朱之上亦畫犀毗花文一鞘兩室各函
一刀靶以皮條纏束貴人以金銀絲

峒刀兩江州峒及諸外蠻無不帶刀者一鞘二刀與
雲南同但以黑漆雜皮爲鞘

黎刀海南黎人所作刀長不過一二尺靶乃三四寸

織細藤纏束之靶端插白角片尺許如鴟鵂尾以爲飾

蠻鞍西南諸蕃所作不用韉但空垂兩木鐙鐙之狀刻如小龕藏足指其中恐入榛棘傷足也後鞞鍍木爲大錢纍纍貫數百狀如中國騾驢鞞

蠻鞭刻木節節如竹根朱墨間漆之長纔四五寸其首有鐵環貫二皮條以策馬

花腔腰鼓出臨桂職田鄉其土特宜鼓腔村人專作窰燒之油畫紅花紋以爲飾

銅鼓古蠻人所用南邊土中時有掘得者相傳爲馬伏波所遺其製如坐墩而空其下滿鼓皆細花紋極工緻四角有小蟾蜍兩人昇行以手拊之聲全似鞞鼓

銳鼓徭人樂狀如腰鼓腔長倍之上銳下侈亦以皮鞞植于地坐拊之

盧沙徭人樂狀類簫縱八管橫一管貫之

胡盧笙兩江峒中樂

藤合屈藤盤繞成柈合狀漆固護之出藤梧等郡

雞毛筆嶺外亦有兔然極少俗不能爲兔毫筆率用雞毛其鋒踉蹌不聽使

練子出兩江州峒大畧似苧布有花紋者謂之花練土人亦自貴重

綵亦出兩江州峒如中國線羅上有徧地小方勝紋蠻氊出西南諸蕃以大理者爲最蠻人晝披夜臥無貴賤人有一蕃

黎幕出海南黎峒人得中國錦綵折取色絲間木綿挑織而成每以四幅聯成一幕

黎單亦黎人所織青紅間道木綿布也桂林人悉買以爲臥具

檳榔合南人旣喜食檳榔其法用石灰或蜆灰并扶留藤同咀則不澀土人家至以銀錫作小合如銀錠樣中爲三室一貯灰一貯藤一貯檳榔

鼻飲杯南人習鼻飲有陶器如杯椀旁植一小管若瓶嘴以鼻就管吸酒漿暑月以飲水云水自鼻入咽快不可言邕州人已如此記之以發覽者一胡盧也牛角杯海旁人截牛角令平以飲酒亦古兕觥遺意

蠻椀以木刻朱黑間漆之侈腹而有足如敦甌之形
竹釜獠人所用截大竹筒以當鑪鼎食物熟而竹不
燔蓋物理自爾非異也

戲面桂林人以木刻人面窮極工巧一枚或值萬錢

桂海禽志

宋 范成大

南方多珍禽非君子所問又余以法禁采捕甚急
故不能多識偶於人家見之及有異聞者錄以備
博物

孔雀生高山喬木之上人探其雛育之喜臥沙中以
沙自浴拘拘甚適雄者尾長數尺生三年尾始長歲
一脫尾夏秋復生羽不可近目損人飼以猪嗚及生
菜惟不食菘

鸚鵡近海郡尤多民或以鸚鵡爲鮓又以孔雀爲腊
皆以其易得故也此二事載籍所未紀自余始志之
南人養鸚鵡者云此物出炎方稍北中冷則發瘴噤
戰如人患寒熱以柑子飼之則愈不然必死
白鸚鵡大如小鶩亦能言羽毛玉雪以手撫之有粉
粘著指掌如蛺蝶翅

烏鳳如喜雀色紺碧頸毛類雄鷄鬃頭有冠尾垂二
弱骨各長一尺四五寸其杪始有毛羽一簇冠尾絕
異大畧如鳳鳴聲清越如笙簫然度曲妙合宮商又

能爲百蟲之音生左右江溪峒中極難得然書傳未
之紀當由人罕識云

秦吉了如鸚鵡紺黑色丹味黃距目下連頂有深黃
文頂毛有縫如人分髮能人言比鸚鵡尤慧大抵鸚
鵡如兒女吉了聲則如丈夫出邕州溪洞中唐書林
邑出結遼鳥林邑今占城去邕欽州但隔交趾疑卽
吉了也

錦鷄又名金鷄形如小雉湖南北亦有之
山鳳皇狀如鶩鴈嘴如鳳巢兩江深林中伏卵時雄

者以木枝雜桃膠封其雌于巢獨留一窠雄飛求食以飼之子成即發封不成則窒窠殺之此亦異物然未之見也

翻毛鷄翎皆翻生彎彎向外尤馴狎不散逸二廣皆有

長鳴鷄高大過常鷄鳴聲甚長終日啼號不絕生邕州溪洞中

翡翠出海南邕賀二州亦有腊而賣之

灰鶴大如鶴通身灰慘色去頂二寸許毛始丹及

之半亦能鳴舞

鷓鴣大如竹鷄而差長頭如鶉身文亦然惟臆前白點正圓如珠人采食之

水雀蒼色似鶴鷄飛集戶庭翾翾然與燕雀為伍

桂海獸志

宋 范成大

獸莫巨於象莫有用于馬皆南土所宜余治馬政
頗補苴漏隙其說累牘所不能載姑著其畧及畜
獸稍異者併為一篇

象出交趾山谷惟雄者則兩牙佛書云四牙又云六
牙今無有

蠻馬出西南諸蕃多自毗那自杞等國來自杞取馬
於大理古南詔也地連西戎馬生尤蕃

大理馬爲西南蕃之最

果下馬上產小駟也以出德慶之瀧水者爲最高不踰三尺駿者有兩脊骨故又號雙脊馬健而喜行
猴有三種金絲者黃玉面者黑純黑者面亦黑金絲玉面皆難得或云純黑者雄金絲者雌又云雄能嘯雌不能也猴性不耐著地著地輒瀉以死煎附子汁飲之卽愈

蠻犬如獵狗警而獠

鬱林犬出鬱林州極高大垂耳拳尾與常犬異

花羊南中無白羊多黃褐白斑如黃牛又有一種深褐黑脊白斑全似鹿

乳羊本出英州其地出仙茅羊食茅舉體悉化爲肪不復有血肉食之宜人

綿羊出邕州溪洞及諸蠻國與朔方胡羊不異

麝香自邕州溪洞來者名土麝氣臊烈不及西蕃

火狸狸之類不一邕別有一種其毛色如金錢豹但其錢差大耳彼人云歲久則化爲豹其文先似之矣
風狸狀似黃猴食蜘蛛晝則拳曲如蝟遇風則飛行

空中其溺及乳汁主大風疾奇效

獺婦如山猪而小喜食禾田夫以機軸織維之器掛田所則不復近安平七源等州有之

山猪卽豪猪身有棘刺能振發以射人三二百爲羣以害禾稼州洞中甚苦之

石鼠專食山豆根賓州人以其腹乾之治咽喉疾効如神謂之石鼠肚

香鼠至小僅如指擘大穴于柱中行地中疾如激箭山獺出宜州溪洞俗傳爲補助要藥洞人云獺性淫

毒山中有此物凡牝獸悉避去獺無偶抱木而枯洞獠尤貴重云能解藥箭毒中箭者研其骨少許傅治立消一枚直金一兩人或求買但得殺死者功力甚劣

桂海蟲魚志

宋 范成大

蟲魚微物外薄于海者其類庸可既哉錄偶見聞者萬一

珠出合浦海中有珠池蟹戶投水採蚌取之歲有豐耗多得謂之珠熟相傳海底有處所如城郭大蚌居其中有怪物守之不可近蚌之細碎蔓延於外者始得而采

車磔似大蚌海人磨治其殼為諸玩物

蝮蛇大者如柱長稱之其膽入藥南人腊其皮刮去
鱗以鞞鼓蛇常出逐鹿食寨兵善捕之數輩滿頭挿
花趨赴蛇蛇喜花必駐視漸近競拊其首大呼紅娘
子蛇頭益挽不動壯士大刀斷其首衆悉奔散遠伺
之有頃蛇省覺奮迅騰擲傍小木盡拔力竭乃斃數
十人昇之一村飽其肉

螭蝮形似龜龜輩背甲十三片黑白斑文相錯鱗差
以成一背其邊裙闕闕嚙如鋸齒無足而有四鬣前
兩鬣長狀如櫂後兩鬣極短其上皆有鱗甲以四鬣
權水而行海人養以鹽水飼以小鱗俗傳甲子庚申
日輒不食謂之螭蝮齋日其說甚俚

蜈蚣有極大者

青螺狀如田螺其大兩拳指磨去麤皮如翡翠色雕
琢爲酒杯

鸚鵡螺狀如蝸牛殼磨治出精采亦雕琢爲杯

貝子海傍皆有之大者如拳上有紫斑小者指面大
白如玉

石蟹生海南形真是蟹云是海味所化理不可詰又

有石蝦亦其類

鬼蛺蝶大如扇四翅好飛荔枝上

黑蛺蝶大如扇橘蠹所化北人云玄武蟬

嘉魚狀如小鮓魚多脂味極腴美出梧州火山人以爲鮮餉遠

蝦魚出灘水肉白而豐味似蝦而鬆美

竹魚出灘水狀似青魚味如鱖魚南中魚品如鯉鯽輩皆有之而以蝦竹二魚爲珍

天蝦狀如大飛蟻秋社後有風雨則群墮水中有小翅人候其墮掠取之爲鮓

桂海花志

宋 范成大

桂林具有諸草花木牡丹芍藥桃杏之屬但培溉不力存形似而已今著其土產獨宜者凡北州所有皆不錄

上元紅深紅色絕似紅木瓜花不結實以燈夕前後開故名

白鶴花如白鶴立春開

南山茶葩萼大倍中州者色微淡葉柔薄有毛別自

有一種如中州所出者

紅荳蔻花叢生葉瘦如碧蘆春末發初開花先抽
餘有大籜包之籜解花見一穗數十蕊淡紅鮮妍如
桃杏花色蕊重則下垂如蒲萄又如火齊纓絡及剪
綵鸞枝之狀此花無實不與草荳蔻同種每蕊心有
兩瓣相竝詞人托興曰比目連理云

泡花南人或名柚花春末開蕊圓白如大珠既拆則
似茶花氣極清芳與茉莉素馨相逼番人采以蒸香
風味超勝

紅蕉花葉瘦類蘆箬心中抽條條端發花葉數層日
折一兩葉色正紅如榴花荔子其端各有一點鮮綠
尤可愛春夏開至歲寒猶芳又有一種根出土處特
肥飽如膽餅名膽餅蕉

枸那花葉瘦長畧似楊柳夏開淡紅花一朶數十萼
至秋深猶有之

史君子花蔓生作架植之夏開一簇一二十葩輕盈
似海棠

水西花葉如萱草花黃夏開

裹梅花卽木槿有紅白二種葉似蜀葵采紅者連葉包裹黃梅鹽漬暴乾以薦酒故名玉修花粉紅色四季開

象蹄花如梔子而葉小夏開至秋深

素馨花比番禺所出爲少當由風土差宜故也

茉莉花亦少如番禺以浙米漿日漑之則作花不絕

可耐一夏花亦大且多葉倍常花六月六日又以治

魚猩水一漑益佳

石榴花南中一種四季常開夏中旣實之後秋深忽

又大發花且實枝頭碩果罅裂而其旁紅英粲然併花實折釘盤筵極可玩

添色芙蓉花晨開正白午後微紅夜深紅

側金盞花如小黃葵葉似槿歲暮開與梅同時

桂海果志

宋 范成大

世傳南果以子名者百二十半是山野間草木實
猿狙之所甘人強名以爲果故余不能盡識錄其
識可食者五十五種

荔枝自湖南界入桂林纔百餘里便有之亦未甚多
昭平出慙核臨賀出綠色者尤勝自此而南諸郡皆
有之悉不宜乾肉薄味淺不及閩中所產

龍眼南州悉有之極大者出邕州圍如當二錢但肉

薄不能遠過常品爲可恨

饅頭柑近蒂起饅頭尖者味香勝可埒永嘉孔柑
金橘出營道者爲天下冠出江浙者皮甘肉酸不逮
矣

綿李味甘美勝常品擘之兩片開如離核桃

石栗圓如彈子每顆有梗抱附之類杓柄肉黃白甘
韌似巴欖子仁附肉有白靨不可食發病北人或呼
爲海胡桃

龍荔殼如小荔枝肉味如龍眼木身葉亦似二果
名可蒸食不可生啖令人發癩或見鬼物三月開小
白花與荔枝同時

木竹子皮色形狀全似大批杷肉皆美秋冬間實
冬桃狀如棗深碧而光軟爛甘酸春夏熟

羅望子殼長數寸如肥皂又如刀豆色正丹內有二
三實煨食甘美

人面子如大梅李核如人面兩目鼻口皆具肉甘酸
宜蜜煎

烏欖如橄欖青黑色肉爛而甘

方欖亦橄欖類三角或四角出兩江州洞

椰子木身葉悉類椶櫚檳榔之屬子生葉間一穗數枚枚大如五升器果之大者謂惟此與波羅蜜等耳皮中子殼可爲器子中瓢白如玉味美如牛乳瓢中酒新者極清芳久則渾濁不堪飲

蕉子芭蕉極大者凌冬不凋中抽榦長數尺節節有花花褪葉根有實去皮取肉軟爛如綠柿極甘冷四季實土人或以飼小兒云性涼去客熱以梅汁漬暴乾按令扁味甘酸有微霜世所謂芭蕉乾者是也又

名牛子蕉

雞蕉子小如牛蕉亦四季實

茅蕉子小如雞蕉尤香嫩甘美秋初實

紅鹽草果取生草荳蔻入梅汁鹽漬令色紅暴乾以薦酒

鸚鵡舌卽紅鹽草果之珍者實始結卽頻取紅鹽乾之纔如小舌

八角茴香北人得之以薦酒少許咀嚼甚芳香出左右江州洞中

餘甘子多販入北州人皆識之其木可以制器

五梭子形甚詭異瓣五出如田家碌碡狀味酸久嚼

微甘閩中謂之羊桃

黎滕子如大梅復似小橘味極酸

波羅蜜大如冬瓜外膚礪礪如佛髻削其皮食之味

極甘子練悉如冬瓜生大木上秋熟

柚子南州名臭柚大如瓜人亦食之皮甚厚打碑者

卷皮蘸墨以代氈刷宜墨而不損紙極便于用此法

可傳但北州無許大柚耳

櫓罌子大如半升椀諦視之數十房攢聚成毬每房

有縫冬生青至夏紅破其瓣食之微甘

槎擦子如錐栗肉甘而微澀

地蠶生土中如小蠶又似甘露子

赤柚子如橄欖皮青肉赤以下竝春實

火炭子如烏李

山韶子色紅肉如荔枝以下八種竝夏實

山龍眼色青肉如龍眼

部諦子色黃如大石榴

木賴子如淡黃大李

粘子如指面大褐色

羅晃子如橄欖其皮七重

千歲子如青黃李味甘

赤棗子如酸棗味酸

藤韶子大如鳧卵柿以下十三種竝秋實

古米子殼黃中有肉如米粒

殼子如青梅味甘

藤核子生白藤上如小蒲桃

木連子如胡桃紫色

蘿蒙子黃如大橙柚

毛栗如橡栗

特乃子狀似榧而圓長端正

不納子似黃熟小梅絕易爛爛卽破肉附核可爲經
珠似菩提子

羊矢子色狀全似羊矢味亦不佳

日頭子狀如櫻桃色如蒲桃穗

秋風子色狀俱似棟子

黃皮子如小棗

朱圓子正圓深紅狀如棟子以下六種皆冬實

匾桃大如桃而匾色正青

粉骨子皮黃色如粉

塔骨子匾如大橘皮裏空虛

布衲子似李而黃

黃肚子如小石榴

桂海草木志

宋 范成大

桂海異志卷之三

異草瑰木多生窮山荒野其不中醫和匠石者人亦不采故余所識者少惟竹品乃多桀異併附于

錄

桂南方奇木上藥也桂林以桂名地實不產而出于

賓宜州凡木葉心皆一縱理獨桂有兩紋形如圭製

字者意或出此葉味辛甘與皮無別而加芳美人喜

咀嚼之

榕易生之木又易高大可覆數畝者甚多根出半身附榦而下以入土故有榕木倒生根之語禽鳥銜其子寄生他木上便蔚茂根下至地得土氣久則過其所寄

沙木與杉同類尤高大葉尖成叢穗少與杉異
枕榔木身直如杉又如樓欄有節似大竹一榦挺上高數丈開花數十穗綠色

思儻木生兩江州洞堅實漬鹽水中百年不腐

膜脂木堅緻色如膜脂可鍤作出融州及州洞桂林屬縣亦有之

雞桐葉如楝其葉煮湯療足膝疾

龍骨木色翠青狀如枯骨

風膏藥葉如冬青治太陽疼頭目昏眩

南漆如稀飴氣如松脂霑霑無力

蕩竹葉大且密畧如蘆葦

澀竹膚麤澀如木工所用砂紙可以錯磨爪甲

人面竹節密而凸宛如人面人採爲拄杖

釣絲竹類蕩竹枝極柔弱

斑竹中有疊暈江浙間斑竹直一淚痕無暈也
貓頭竹質性類筍竹

桃枝竹多生石上葉如小櫻櫚人以大者爲杖
笏竹刺竹也芒棘森然

箭竹山中悉有

宿根茄茄本不凋明年結實

銅鼓草其實如爪療瘡瘍毒

大蒿容 道中久無霜雪處年深滋長大者可作屋
小亦中肩輿之扛

石髮出海上海纖長如絲縷

匾菜細如荇蒂匾如薤菜長一二尺

都管草一莖六葉辟蜈蚣蛇

花藤鏃以爲器用中有花紋

胡蔓藤毒草也揉其草漬之水入口卽死

桂海雜志

宋 范成大

嶠南風土之異宜錄以備博聞而不可以部居謂之雜志

雪南州多無雪霜草木皆不改柯易葉獨桂林歲歲得雪或臘中三白然終不及北州之多靈川興安之間兩山蹲踞中容一馬謂之巖關朔雪至關輒止大盛則度送至桂林城下不復南矣

風廣東南海有颶風西路稍北州縣悉無之獨桂林

多風秋冬大甚拔木飛瓦晝夜不息俗傳朝作一日止暮七日夜半則彌旬去海猶千餘里非颶也土人自不知其說余試論之桂林地勢視長沙番禺在千丈之上高而多風理固然也

癸水桂林有古記父老傳誦之畧曰癸水繞東城永不見刀兵癸水灘江也

瘴二廣惟桂林無之自是而南皆瘴鄉矣瘴者由嵐水毒與草莽沴氣鬱勃蒸熏之所為也其中人如瘡狀治法雖多常以附子為急須不換金正氣散為通

用邕州兩江水土尤惡一歲無時無瘴春日青草瘴夏曰黃梅瘴六七月曰新禾瘴八九月曰黃茅瘴土人以黃茅瘴為尤毒桂嶺舊不知的實所在城北五里有尋丈小坡立石其上刻曰桂嶺賀州自有桂嶺縣相傳始名嶺在其地今小坡非也

俗字邊遠俗陋牒訴券約專用土俗書桂林諸邑皆然今姑記臨桂數字雖甚鄙野而偏傍亦有依附

矮音不長也閏音坐于門中穩也歪音亦音大坐亦穩也

小兒也天音人瘦弱也歪音人亡絕也否音不

能舉足也妖

音大

女大及姊也

音石

山石之巖窟也

音

據門橫關也他不能悉紀余閱訟牒二年習見之大

理國間有文書至南邊及商人持其國佛經題識猶有用囹字者囹武后所作國字也唐書稱大禮國今其國止用理字

捲伴南州法度踈畧婚姻多不正村落強暴竊人妻女以逃轉移他所安居自若謂之捲伴言捲以為伴侶也已而復為後人捲去至有歷數捲未已者其舅姑若前夫訪知所在詣官自陳官為追究往往所謂前夫亦是捲伴得之復為後人所捲惟其親父母兄弟及初娶者所訢即歸始初被捲之家

草子即寒熱時疫南中吏卒小民不問病源但頭痛體不佳便謂之草子不服藥使人以小錐刺唇及舌尖出血謂之挑草子實無加損于病必服藥乃愈

桂海蠻志

宋 范成大

廣西經畧使所領二十五郡其外則西南諸蠻蠻之區落不可殫記姑記其聲問相接帥司常有事于其地者數種曰羈縻州洞曰徭曰蠻曰黎曰瑩通謂之蠻

羈縻州洞隸邕州左右江者為多舊有四道儂氏謂安平武勒忠浪七源四州皆儂姓又有四道黃氏謂安德歸樂露城田州皆黃姓又有武侯延眾石門感

德四鎮之民自唐以來內附分析其種落大者爲州小者爲縣又小者爲洞國朝開拓寢廣州縣洞五十餘所推其雄長者爲首領藉其民爲壯丁其人物獷悍風俗荒怪不可盡以中國教法繩治姑羈縻之而已有知州權州監州知縣知洞其次有同發遣權發遣之屬謂之主戶餘民皆稱提陀猶言百姓也其田計口給民不得典賣惟自開荒者由已謂之祖業口分田知州別得養印田猶圭田也權州以下無印記者得蔭免田旣各服屬其民又以攻剽山獠及博買

嫁娶所得生口男女相醮給田使耕教以武技世世隸屬謂之家奴亦曰家丁民戶強壯可教勸者謂之田子田丁亦曰馬前牌總謂之洞丁今黃姓尚多而儂姓絕少智高亂後儂氏善良許從國姓今多姓趙氏有舉洞純一姓者婚姻不以爲嫌酋豪或娶數妻皆曰媚娘宜州管下亦有羈縻州縣十餘所其法制尤疏幾似化外其尤者曰南丹州待之又與他州洞不同特命其首領莫氏曰刺史月支鹽料及守臣供給錢其說以謂宜州徼外卽唐黃家賊之地崇建南

丹使控制之莫氏家亦有時相致事今制史莫延

萑逐其弟延廩而自立延廩奔朝廷謂之蠻宋是州

明者皆

稱出木

猛本五溪槃瓠之後其壤接廣右者靜江之興安義

寧古縣融州之融水懷遠縣界皆有之至深山重溪

中椎髻跣足不供征役各以其遠近為伍

獠在右江溪洞之外俗謂之山獠依山林而居無會

長版籍蠻之荒忽無常者也以射生食動而活蟲豸

能蠕動者皆取食無年甲姓名一村中惟有事力者

曰郎火餘但稱火舊傳其類有飛頭鑿齒鼻飲白衫

花面赤禪之屬二十一種今在江西南一帶甚多殆

百餘種也

蠻南方曰蠻今郡縣之外羈縻州洞雖故皆蠻地猶

近省民供稅役故不以蠻命之遇羈縻則謂之化外

真蠻矣區落連亘接于西戎種類殊詭不可勝記今

志其近桂林者宜州有西南蕃大小張大小王龍石

滕謝諸蕃地與牂牁接人椎髻跣足或著木履衣青

花斑布以射獵讐殺為事又南連邕州南江之外者

羅殿自杞等以國名羅孔特磨白衣九道等以道名而峩州以西別有會長無所統屬者蘇綺羅坐夜面計利流求萬壽多嶺阿悞等蠻謂之生蠻會自謂太保大抵與山獠相似但有首領耳羅殿等處乃成聚落亦有文書公文稱守羅殿國王其外又有大蠻落西曰大理東曰交趾大理南詔國也交趾古交州治龍編又爲安南都護府

黎海南四郡嗚上蠻也嗚直雷州由徐開渡半日至嗚之中有黎母山諸蠻環居四傍號黎人山極高常在霧靄中黎人自鮮識之夕晴海氣清廓時或見翠尖浮半空云蠻皆椎髻跣足插銀銅錫釵婦人加銅環耳墜垂肩女及笄卽黥頰爲細花紋謂之繡面女旣黥集親客相慶賀惟婢獲則不繡面四郡之人多黎姓蓋其裔族而今黎人乃多姓王

蜚海上水居蠻也以舟楫爲家採海物爲生且生食之入水能視合浦珠池蚌蛤惟蜚能沒水採取旁人以蠅繫其腰繩動搖則引而上先煮毳衲極熱出水急覆之不然寒慄而死或遇大魚蛟鼉諸海怪爲鬻

鼠所觸往往潰腹折支人見血一縷浮水面知蝥死矣



